



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2011. GODINU HRVATSKE STRANKE PRAVA HERCEG-BOSNE

Broj: 03-07-6-449/12  
Sarajevo, 16. novembar 2012. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	4
Predmet pregleda i kontrole .....	4
Cilj pregleda i kontrole .....	5
Obim pregleda i kontrole .....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	5
5.1. NALAZI.....	5
5.2. PREPORUKE .....	6

## MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Hrvatske stranke prava Herceg-Bosne za 2011. godinu.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

- 1. Hrvatska stranka prava Herceg-Bosne prekršila je odredbe člana 11. stav (1) i stav (3) Zakona o finansiranju političkih stranaka.**

**Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Hrvatske stranke prava Herceg-Bosne za 2011. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska stranka prava Herceg-Bosne je ostvarila ukupne prihode u iznosu od 6.207,00 KM, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u uk. prih. %
1	Članarina	0,00	0,00%
2	Prilozi fizičkih lica	0,00	0,00%
3	Prilozi pravnih lica	0,00	0,00%
4	Prihodi od imovine	0,00	0,00%
5	Prihodi od pr.lica	0,00	0,00%
6	Prihodi od poklona	1.350,00	21,75%
7	Prihodi iz budžeta	4.857,00	78,25%
	Ostali prihodi	0,00	0,00%
	<b>Ukupni prihodi:</b>	<b>6.207,00</b>	<b>100,00%</b>

U godišnjem finansijskom izvještaju stranka je iskazala ukupne rashode u iznosu od 2.902,29 KM.

## 2. PREDSTAVLJANJE POLITIČKE STRANKE

Naziv političke stranke: Hrvatska stranka prava Herceg-Bosne. Skraćeni naziv: HSP H-B.

Stranka je upisana u registar Općinskog suda Mostar rješenjem broj: R/1-10 od 09.03.2010. godine.

Sjedište političke stranke je u Mostaru, K.Katarine br. 11.

Za zastupanje stranke ovlašteni su Vesna Pinjuh, predsjednik i Ivan Tokić, zamjenik predsjednika.

Lice ovlašteno za podnošenje finansijskih izvještaja za 2011. godinu je Vesna Pinjuh.

Prema podacima iz godišnjeg finansijskog izvještaja za 2011. godinu, Hrvatska stranka prava Herceg-Bosne ima sljedeću organizacionu strukturu:

- Predsjedništvo HSP H-B
- Podružnica HSP H-B Čapljina i
- Županijsko vijeće HSP H-B Posavske županije.

## 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Hrvatske stranke prava Herceg-Bosne za 2011. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskih izvještaja Hrvatske stranke prava Herceg-Bosne obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta.

#### **4. PRETHODNE KONTROLE I REVIZIJE**

Obavljen je pregled godišnjeg finansijskog izvještaja Hrvatske stranke prava Herceg-Bosne za 2010. godinu, nakon čega je izdat izvještaj o pregledu sa mišljenjem revizora i nalazima. Prema mišljenju Službe za reviziju, Hrvatska stranka prava Herceg-Bosne je u izvještajnom periodu postupala u skladu sa odredbama Zakona o finansiranju političkih stranaka.

#### **5. NALAZI I PREPORUKE**

##### **5.1. NALAZI**

**Hrvatska stranka prava Herceg-Bosne prekršila je odredbe člana 11. stav (1) i stav (3) Zakona o finansiranju političkih stranaka.**

- (1) Na osnovu obavljenog pregleda godišnjeg finansijskog izvještaja za 2011. godinu, utvrđeno je da Hrvatska stranka prava Herceg-Bosne nije uspostavila potpune evidencije o svojim prihodima i rashodima, čime je prekršila odredbe člana 11. stav (1) Zakona o finansiranju političkih stranaka.

Uvidom u Godišnji obračun (bilans stanja i bilans uspjeha) za 2011. godinu koji je predat Agenciji za pružanje finansijskih, informatičkih i posredničkih usluga d.d. Mostar, utvrđeno je da su prihodi i rashodi stranke iskazani u manjem iznosu za 1.350,00 KM u odnosu na podatke koji su iskazani u godišnjem finansijskom izvještaju za 2011. godinu.

Stranka u godišnjem obračunu nije iskazala nenovčane donacije u iznosu od 1.350,00 KM, troškove zakupnine u iznosu od 1.200,00 KM i troškove knjigovodstvenih usluga u iznosu od 150,00 KM.

Takođe je utvrđeno da analitičke evidencije i bruto bilans stranke ne odgovaraju podacima koje je stranka iskazala u bilansu stanja i uspjeha za 2011. godinu. Prema podacima sa analitičke kartice konta blagajne i godišnjeg obračuna, stranka na dan 31.12.2011. godine u blagajni nije imala sredstva, dok je u bruto bilansu stranke na dan 31.12.2011. godine iskazano 244,91 KM.

Pregledom je utvrđeno i da stranka nije pravilno uspostavila knjigovodstvene evidencije o obavezama prema dobavljačima. Uvidom u analitičku karticu obaveza prema dobavljačima, utvrđeno je da su obaveze iznosile od 250,00 KM. S druge strane, stranka je u bruto bilansu iskazala obaveze u iznosu od 5,09 KM, odnosno u završnom računu (bilansu stanja na dan 31.12.2011. godine) nisu iskazane obaveze.

Na osnovu navedenog, utvrđeno je da poslovne knjige nisu uspostavljene, niti se vode u skladu sa zakonskim propisima i ustaljenom računovodstvenom praksom, što kao rezultat ima pogrešno finansijsko izvještavanje.

- (2) Hrvatska stranka prava Herceg-Bosne nije godišnji finansijski izvještaj popunila u skladu sa Pravilnikom o godišnjim finansijskim izvještajima političkih stranaka, čime je prekršila odredbe člana 11. stav (3) Zakona o finansiranju političkih stranaka.

HSP BiH je dostavila obrazac 2-1 (pregled prometa putem blagajne) posebno za organizacione odbore, što nije u skladu sa članom 7. stav (2) Pravilnika o godišnjim finansijskim izvještajima političkih stranaka<sup>1</sup>. Uvidom u godišnji finansijski izvještaj za 2011. godinu, utvrđeno je da je HSP H-B obrazac 2-1 dostavila posebno za organizacione odbore stranke, tj. Predsjedništvo i ŽV Posavske županije.

Takođe je utvrđeno da podaci o prometu ostvarenom putem blagajne iskazani u obrascima 2-1 ne odgovaraju podacima iz poslovnih knjiga, čime su prekršene odredbe člana 12. Pravilnika o godišnjim finansijskim izvještajima političkih stranaka

HSP H-B je u obrascima 2-1 navela da je ostvarila ukupan promet ulaza, odnosno izlaza putem blagajne Predsjedništva HSP H-B i blagajne ŽV HSP H-B Posavske županije u iznosu od 2.580,00 KM, dok je prema podacima iz poslovnih knjiga, HSP H-B u toku 2011. godine poslovanje obavljala putem jedne blagajne i da je ukupan promet ulaza, odnosno promet izlaza iznosio 1.290,00 KM.

## 5.2. PREPORUKE

*Preporučuje se Hrvatskoj stranci prava Herceg-Bosne da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da, u skladu sa članom 11. stav (1) ovog zakona, vodi potpune evidencije o prihodima i rashodima, i*
- *da, u skladu sa odredbama člana 11. stav (3) Zakona o finansiranju političkih stranaka, finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.*

## KOMENTAR:

U ostavljenom roku, Hrvatska stranka prava Herceg-Bosne nije dostavila primjedbe na Preliminarni izvještaj o pregledu godišnjeg finansijskog izvještaja za 2011. godinu.

Mr. Hasida Gušić, šef Službe za reviziju

Sanja Čabrilo, revizor

---

<sup>1</sup> Finansijski izvještaj na nivou stranke podnosi se na obrascima 1, 1-1, 2, 2-1, 3, 3-f, 4 i 5, a za organizacione dijelove stranke na ostalim obrascima navedenim u članu 5. ovog pravilnika, i to posebno za svaki organizacioni dio političke stranke.